


**JABUETSUATIQUE
DIUSU SA MIMI
ANTIGUO TESTAMENTO**

Moisés



**JABUETSUATIQUE
DIUSU SA MIMI
ANTIGUO TESTAMENTO**

Moisés

LIGA BIBLICA MUNDIAL



LAS SAGRADAS ESCRITURAS PARA TODOS

en colaboración con
El Instituto Lingüístico
de Verano
Cochabamba, Bolivia

Enero 1984
310

Impreso por CALA - La Paz , Bolivia



Mimiameque ECUINANAJI (Exodo)

Egipto yahua su aniji cristiano cuana ja israelita cuana nedaneda ataidha (Exodo 1)

Yanana chidi Moisés inatsihuataidha Tata Diusu ja (Ex. 2)

Moisés Faraón sa ete aida su aniji puidha (Ex. 2)
páginas 73 - 77.

Ecuinanaji quirica ja quisa epuani cuaja israelita cuana cuinanataidha Egipto yahua jenetia tuna sa yahua quitaita su ecuinati puji. Israelita cuana anitaidha Egipto yahua su jucuada mara puji. Ebia su jajucuatitaidha huecuana. Echua puji Faraón ja jubida muduametaidha huecuana. Ebia su nedaneda ataidha huecuana. Faraón ja ena su israelita deja yanana chidi cuana ejusianubiata puji pibataidha. Da su soldado cuana cuatsasiataidha. Piada israelita butseji ja bahui mesa yanana chidi jusianubiaja mahue ataidha. Da su yanana sa cuara ja d'iti chidi ataidha. Tueda d'iti chidi asaisiajiji puina ena bia su pabed'a puji. Da dume su nubiametaidha tse yanana chidi ena su muhui duju su erubua puji. Da su Faraón sa ebaquepuna ja d'iti ena su eded'asa bataidha, nahuija puti putsu. Ba putsu, yanana chidi jemitsuataidha. Mesa ete su dusutaidha esehuame puji. Moisés ebani ichataidha. Moisés Faraón sa ete su sehuaidha mesa utsecua pu cua nime.

Jeutsuque ye jaquisabati cuana. Dereque upia.

1. ¿Quebata quirica ja cuaja israelita cuana Egipto yahua jenetia cuiname putaidha ecuana eshanapametani? _____
2. ¿Cuaja banime putaina Israel sa 12 ebacua cuana? _____
3. ¿Jucuaja su Faraón ja israelita cuana nedaneda ataidha? _____
4. ¿Cuaja cuatsasiataidha Faraón ja israelita cuana mecuana sa deja yanana chidi cuana neje paputa puji? _____
5. ¿Cuaja d'eji su pume puidha yanana Moisés? _____

Jabuetsuatique Israel sa 12 ebacua cuana sa ebani. (Chacuque ebani cuana página 57 Antiguo Testamento quirica su.)

Mimiameque Moisés huisha quinaji puina. (Ex. 2)

Diusu ja ihuataidha Moisés. (Ex. 3)

páginas 77 - 80.

Moisés edhi eduju beju puina su, piada egipcio deja israelita deja neje eichetineti bataidha. Daja ba putsu. Moisés ja manuametaidha egipcio deja. Da su Faraón Moisés neje duininidha. Da putsu, Moisés jududuidha pia yahua su. Dapia huisha quinaji anitidha. Piada tsine Moisés ja equi chidi eutsuneti bataidha. Diusu ja Moisés equi chidi utsu jenetia mitsutaidha. Egipto yahua su pasiapati puji cuatsasiataidha israelita cuana pia yahua su pahuidusuta puji. Moisés mu jasiapatija mahue puidha. Daja biame, Diusu sa tsada puidha Moisés pasiapati puji. Moisés sa edue Aarón da mesa ebuqueji papu puji Diusu ja cuatsasiataidha. Chama cama Moisés ja Diusu jei ataidha.

1. ¿Jucuaja su Moisés ja egipcio deja manuametaidha? _____

2. ¿Quebata yahua su jududuidha Moisés? _____
3. ¿Ai Moisés sa mudu puidha pia yahua su? _____
4. ¿Que jenetia Diusu ja mitsutaidha Moisés? _____
5. ¿Jucuaja su Diusu ja israelita cuana pia yahua su dusuja ataidha? _____
6. ¿Jucuaja su Moisés Egipto yahua su putija mahue puidha? _____

Jabuetsuatique versículo Hebreos 11.27.

Mimiameque Moisés jasiapatidha Egipto yahua su (Ex. 4,5,6)

Tata Diusu ja matsetaidha Egipto yahua su aniji
cristiano cuana (Ex. 7 - 10) páginas 80 - 85.

Moisés, mesa edue Aarón neje israelita tata edhi cuana peje su putidha. Shanapametaidha huecuana Diusu ja tuneda pia yahua su dusuja yatani. Da su Moisés Aarón neje echua puji Faraón peje su putidha. Bajataidha tse pacuinana Egipto yahua jenetia israelita cristiano cuana. Faraón ja mesiaja mahue ataidha huecuana. Da su mecuana sa mudu yapacataidha. Da putsu Moisés Aarón neje nimetiuda ai cuana ataidha Faraón parubutana puji. Daja biame, Faraón ja israelita cuana mesiaja mahue ataidha. Da putsu, Diusu ja dueji dueji egipcio cristiano cuana nedaneda ataidha. Pamapa nuati su Faraón ja bajataidha tse egipcio cristiano cuana jamatseti jenetia pajemicuinata puji. Ahua daja yata tse su, israelita cuana mesiata cua Faraón puidha. Da su pamapa nuati su tueda jamatseti cuana jenetia Diusu ja jemicuinaidha su, Faraón neicha hue muesumu tadada puibana. Da su Diusu ja pibataidha equene jamatseti cuana ebia su tucheda neicha ebeitu puji.

1. ¿Aidhe cuana peje su equene putidha Moisés, Aarón detse?_____

2. Da su, ¿Aidhe peje su macha putidha tse?_____

3. Dereque upia 8 jamatseti cuana Diusu ja beitutaidha egipcio cristiano cuana sa puji.

Jabuetsuatique saida versículo Hebreos 11.27.

Mimiameque Equene puji ebacua manutaidha (Ex. 12)

páginas 85 - 87.

Diusu ja israelita cuana uja ataidha:

--Yama micuana ebuetsua cuaja micuaneda Egipto yahua jenetia cuinaname epu. Ye dhidha su quitaita micuaneda ecuinana.

Neicha Diusu ja uja ataidha huecuana:

--Pamapa israelita familia sa piada huisha janana manuame putsu, tueda huisha sa ami neje enubiji eteriji su huire taji. Huisha aicha rare taji ye dhidha edia puji. Aicha erare, eina patseda cuana, pan levadura mahue neje padiata huecuana. Pamapa tueda ai dia taji cuana jabasetatijiji tuneseda dia taji tipeida ecuinana puji. Da su yama tije jamatseti yayu. Ema ejaitiana pamapa ye yahua je. Beju emanuame da yama quebata ete enubiji eteriji ami neje huirejiji mahue sa equene ebacua cuana. Jiahue jenetia ye tsine aida israelita cuana ja yapiruta, yama mecuana sa equene ebacua cuana mue manuame aitia, ami enubiji eteriji su baitia putsu.

Daja Diusu ja cuatsasiataidha israelita cuana ja paata puji. Da jenetia Moisés, Aarón detse israelita cuana su ehuidusuji puina.

1. ¿Ai jana mecuana sa baseta taji puidha tueda tsine su? _____

2. ¿Ai ataidha huecuana huisha janana sa ami neje? _____

3. ¿Quetsunu egipcio yahua jenetia cuinanataidha? _____

4. ¿Ai jamatseti puidha tije? _____

Jabuetsuatique saida quita versículo Hebreo 11.27.



Mimiameque Equene puji e bacua cuana manutaidha (Ex. 11)
páginas 85 - 87.

Uja Tata Diusu puidha:


--Emanuamepe da yama pamapa cristiano cuana sa equene e bacua cuana ye Egipto yahua su. Beju eid'e yama ya enubiji eteriji su ami neje huirejiji cuana sa equene e bacua cuana bahui.

Da su israelita cuana ja huisha janana sa ami neje huiretaidha pamapa ete enubiji eteriji su. Beju daja putaidha huecuana cuaja Tata Diusu ja cuatsasiataidha batame. Da su dhidha dusetete su Diusu jaitianaidha Egipto yahua je. Beju manutaidha egipcio cuana sa equene e bacua cuana. Enubiji eteriji ami neje ajiji cuana sa bahui mue manu putaidha.

Beju ye quisa cuana ja ecuana ebuetsuatani cuaja Diusu ja mesa e bacua Jesucristo beitutaidha ye mundo su huisha janana nime pamanu puji. Cuaja israelita cuana ja mecuana sa equene e bacua cuana pamanu mahue puji ami enubiji eteriji su huiretaidha su nime, daja nime jiahue Diusu ja ecuana d'ejiji su yatani Jesucristo Jesucristo sa ami jepuiti tu peje su enimetuheatiani putsu.

1. ¿Cuaja Diusu ja cuatsasiataidha israelita cuana tuna sa cuinana epu puji? _____
2. ¿Cuaja mecuana sa jabasetati taji puina? _____
3. ¿Cuaja mecuana sa a taji puina mecuana sa equene ebacua cuana pamanu mahue puji? _____
4. ¿Quebata cuana sa equene ebacua cuana manutaidha? _____
5. ¿Ai da ecuana ebuetsuatani ye quisa cuana ja? _____
6. Tije jamatseti jaitianaja su, ¿cuaja quisataidha Faraón ja israelita cuana? _____

Jabuetsuatique versículo Hechos 8.32.



Mimiameque Israelita cuana cuinanataidha Egipto yahua jenetia

(Ex. 12)

Israelita cuana ja Mar Dherena petuataidha

(Ex. 14) páginas 87 - 91.

Da dhidha su quitaita cuinanataidha israelita cuana Egipto yahua jenetia. Egipcio cuana ja ebia su ai saida cuana cha tia hue ataidha huecuana. Diusu ja huidusutaidha huecuana pamapa tsine judu cuarecuare neje. Daja huecha dhidha cuana su tueda judu cuarecuare japiatidha cuati utsu neje tuna ehuidusu puji. Da su beju Faraón ebia su pibapibaidha, cuinanataidha huecuana putsu. Da su soldado cuana beitutaidha israelita cuana pajetitayu puji. Beju israelita cuana jududutaidha. Diusu ja bametaidha pajududuta huecuana Mar Dherena duse teje je. Ena duse teje edid'i murida ametaidha tuna paanipetuta puji. Edid'i buahua detse su ena nahuebataidha. Da su pamapa israelita cuana jaitianataidha tueda edid'i murida je. Egipto soldado cuana ja tije ataidha huecuana. Tuna yanipetutasa cama, Diusu ja neicha hue ena nariametaidha. Da su pamapa egipcio soldado cuana huidipetaidha. Da neje Diusu ja israelita cuana jududuametaidha.

1. ¿Quetsunu cuinanataidha israelita cuana Egipto yahua jenetia? _____
2. ¿Quejucua israelita cuana anitaidha? _____
3. ¿Ai neje Diosu ja israelita cuana huidusutaidha? _____

4. ¿Aidhe cuana Faraón ja israelita cuana pajetitayu puji beitutaidha? _____
5. ¿Cuaja manuame putaidha egipcio soldado cuana? _____

Jabuetsuatique saida versículo Hechos 8.32.



Mimiameque Tata Diosu ja pan tiajiji buepa jenetia (Ex. 16)
Tata Diosu ja yahui tiataidha tumu aida jenetia
 (Ex. 17) páginas 91 - 93.

Beju yahua murida je jaitiana putsu, israelita cuana ebia su dhemanutaidha. Da putsu, Moisés sa puji madhada hue mimitaidha huecuana. Da su Diosu ja beitutaidha pan nime jana buepa jenetia padiadiata huecuana puji. Pamapa apudaya tueda jana baji pu cua nime dajajametaidha. Tuneda chudutaidha pamapa apudaya piada tsine puji. Daja huecha Diosu ja jucuada buni pu cua nime d'ia cuana beitutaidha israelita cuana sa aicha ediaji paani puji.

Pia tsunu su yahui ai mahue puidha israelita cuana sa eid'iji puji. Da su Diosu ja uja cuatsasiataidha Moisés:

--Icheque jichu tumu epa mique huara neje pacuinana yahui cristiano cuana paid'iti puji.

Daja Moisés ja ataidha su, cuinanaidha aida yahui bitada.

1. ¿Ai jana tiataidha Diosu ja israelita cuana? _____
2. ¿Ai banime puidha buepa jenetia jana? _____
3. ¿Quejucua mara puji israelita cuana ja tueda buepa jenetia jana diataidha? _____
4. ¿Ai ametaidha Diosu ja Moisés, cristiano cuana jaid'itija puidha su? _____



Mimiamaque Tata Diusu ja tiataidha mesa jacuatsasiati cuana

(Ex. 19,20)

Neicha Tata Diusu mimidha Moisés neje

(Ex. 20 - 23) páginas 93 - 97.

Quimisha badi jenetia israelita cuana cuinatitaidha Sinai banime emata su. Da su Moisés emata su tsuatidha Diusu neje emitsuti puji. Diusu ja ai iyuda cuana ataidha. Emata riariataidha. Da jenetia cuinanataidha tiri, tserutseru, dharara cuana. Ye ai cuana jepuiti israelita cuana iyuame pupirutaidha. Diusu sa tsada puidha cristiano cuana atasaida paputa puji. Da su Diusu ja Moisés tiataidha mesa jacuatsasiati cuana cristiano cuana bahue paputa puji mesa piba cuana. Tueda jacuatsasiati cuana neje Diusu ja cristiano cuana cuaja pia cuana neje saida anime paputa puji ebuetsuatani. Beta tumu pachata su mesa jacuatsasiati cuana deretaidha.

1. ¿Ai puji Diusu ja mesa jacuatsasiati cuana cristiano cuana tiataidha? _____
2. ¿Ai Diusu ja ataidha cristiano cuana iyuame eputa puji? _____

3. ¿Ai bia su deretaidha Diusu ja mesa jacuatsasiati cuana? _____

4. Upia dereque 10 Diusu sa jacuatsasiati cuana.

Mimiameque Cristiano cuana ja tururutaidha
oro jenetia ajiji huaca janana butse su
 (Ex. 32) páginas 98 - 101.

Beju Moisés emata su tsunutaidha putsu, israelita cuana madhada hue japibapirutitaidha. Huaca janana eimea jaatitaidha huecuana diusu pu cua nime emitsutsua puji. Diusu ja, tueda ai madhada cuana ba putsu, Moisés quisataidha emata jenetia pabuteyu puji. Moisés buteyu putsu, oro jenetia ajiji huaca janana bataidha. Ba putsu beju, duininidha. Da su Diusu sa tumu pachata su derejiji jacuatsasiati detse yahua su jusiautetaidha. Beju jacarutidha tumu pachata detse. Da su beju carucaru ataidha oro jenetia huaca janana eimea. Da putsu, dueji huaca eimea mitsutsuaji cuana manutaidha.

Da su beju neicha Moisés emata su tsuatidha. Neicha Diusu ja Moisés tumu pachata su derejiji jacuatsasiati detse tiataidha.



1. ¿Aidhe ja oro jenetia huaca janana ataidha? (Chacunque página 98 Antiguo Testamento quirica su.) _____
 2. ¿Jucuaaja su Moisés ja tumu pachata su derejiji jacuatsasiati detse carutaidha? ¿Daja huecha oro jenetia ajiji huaca janana? _____
 3. ¿Jucuaaja su Diosu duininidha? _____
-

Jabuetsuatique versículo 1 Juan 5.21.



Mimiameque Israelita cuana ja Diusu sa ete ataidha

(Ex. 35 - 39) páginas 102 - 110.

Diusu ja Moisés cuatsasiataidha piada carpa ete israelita cuana ja paata puji, dapia tu pamitsutsuata huecuana puji. Diusu ja quisataidha huecuana cuaja carpa ete, pamapa ai ete cuana neje paata huecuana puji. Tueda carpa ete dume su Diusu israelita cuana sa sacerdote cuana neje emitsuti puji. Dapia pamapa israelita cuana ja ai eirutsuaji cuana dusutaina sacerdote cuana ja Diusu peje su pairutsuata puji.

Beta cuarto chidi anidha Diusu sa carpa ete su. Piada cuarto banime puina Iyuda Etijude. Pia cuarto banime puina Ebia su Iyuda Etijude. Betana cuarto su pamapa eirutsuaji ai cuana anitaina. Daja huecha carpa ete etsequeini su pia eirutsuaji ai cuana anitaina. Etseque je di tihueirijiji aida anina. Israelita cuana sa dusu taji puidha Diusu sa carpa ete quepia tuna sa puti taji su.



1. ¿Ai jenetia ajiji Diusu sa carpa ete? _____


2. ¿Ai cuana anitaina Iyuda Etijude su? _____
3. ¿Ai cuana anitaina Ebia su Iyuda Etijude su? _____

4. ¿Ai cuana anitaina carpa ete sa etsequeini su? _____

5. ¿Ai jenetia ajiji etihueiri? _____
6. ¿Ai puji Diusu sa tsada puidha carpa ete? _____

7. Upia dereque cuaja puina Diusu sa caju Ebia su Iyuda
Etijude su. _____

Jabuetsuatique saida versículo 1 Juan 5.21.



Mimiameque Cristiano cuana Canaan yahua naja su cuinatitaidha
(Números 13,14) páginas 111 - 113.

Eidadaji quirica su quisa epuani cuaja israelita cuana asetaidha. Tuna sa Canaan banime yahua naja su cuinatitaidha huecuana. Beitutaidha huecuana 12 deja cuana Canaan yahua saida ahua mahue pabatita huecuana puji. Beju yahua saida quita bataidha huecuana. Daja biame, dapia aniji cristiano cuana ebia su tucheda eni epishitiame puji bataidha huecuana. Da su beju 12 deja cuana ja israelita cuana daja quisataidha su, israelita cuana iyuame pupirutaidha. Nubija mahue putaidha tueda yahua su. Jasiapatija putaidha huecuana Egipto yahua su, iyuame pu putsu. Da putsu, Diosu duininidha tuna neje, mue tu peje su janimetuheatita huecuana putsu. Daja mecuana sa puniuneti taji puidha d'anita yahua je jucuada mara puji Canaan yahua su nubiji mahue su. Mecuana sa ebacua, utsecua cuana bahui nubi taji puidha tueda yahua su.

1. ¿Ai banime quimisha puji quirica Biblia su? _____
2. ¿Ai dusetaidha 12 deja cuana ja Canaan yahua jenetia? _____

3. ¿Jucuaja su iyuame putaidha israelita cuana tuna sa yahua Canaan su enubi puji? _____
4. ¿Jucuaja su Diosu duininidha israelita cuana neje? _____

12

Mimiameque Tata Diusu ja Coré, pia deja cuana neje

matsmtaidha (Números 16)

Shasha huid'ataidha Aarón sa huara su (Núm. 17)

Moisés ichetaidha tumu (Núm. 20)

páginas 113 - 117.

Ciré ja, pia deja cuana neje Moisés neje jamajaiti putsu, duinininetianataidha. Da putsu, Diusu ja tueda deja cuana neje tupupai, Coré matsetaidha. Yahua dhame putsu, dajajametaidha huecuana pamanuta puji. Da neje Diusu tucheda jabametaidha cristiano cuana butse su Moisés sa puji. Aarón sa huara di shasha ametaidha. Pia tata edhi cuana sa huara mu mue huid'ata puidha. Da neje Diusu ja bametaidha Moisés ehuidusuji deja puji.

Daja hue aseniunetitaidha putsu, neicha hue cristiano cuana jaid'itija putaidha. Da su Diusu ja ataidha Moisés pamitsuta tumu yahui pacuinana puji. Moisés ja tumu mitsu taji biame, turubataidha. Da putsu, Diusu ja Moisés Canaan yahua su panubi mahue ataidha.

1. ¿Jucuaja su Coré, mesa ebuqueji cuana neje manuidha? _____

2. ¿Ai puji Diusu ja huid'atametaidha Aarón sa huara? _____

3. ¿Quepia ichajusiataidha Moisés ja Aarón sa huara
huid'atajiji? _____
4. ¿Cuaja su Moisés duininidha cristiano cuana neje? _____

5. ¿Ai da Moisés sa castigo puji puidha? _____

Mimiameque Moisés ja bacua netianametaidha (Núm. 21)

páginas 117 - 119.

Daja hue pamapa nuati su mimimitaina israelita cuana Moisés jepuiti. Da su Diusu ja beitutaidha bacua jadiati neda tuna padiata huecuana puji. Ebia su cristiano cuana emanutani ba putsu, putitaidha huecuana Moisés peje su. Tuahueda Diusu pabajata puji bajataidha huecuana tueda bacua cuana pataitanata puji. Da su Diusu ja Moisés quisataidha cuaja eiduenetita huecuana puji, ahua tuna sa ajiji ai madhada cuana jepuiti ene eichenuquisatita su. Diusu ja ataidha Moisés bronce jenetia bacua a putsu, aqui su pabadeanata puji. Bacua ja diajiji israelita cuana ja tueda bacua ebade janimetucheati neje ba putsu, beju esaisitayu. Tueda bronce jenetia ajiji bacua quisa cuana ja ecuana ebuetsuatani. Cuaja bacua ja diajiji cuana ja janimetucheati neje chama putsu, eid'e putaidha nime, daja nime jahue ecuaneda d'ejí su pu cua, Jesucristo curusu su janimetucheati neje ba putsu.



1. ¿Jucuaja su israelita cuana ja madhada neje Moisés mitsutaidha? _____
2. ¿Jucuaja su Diosu ja matsetaidha israelita cuana? _____
3. ¿Cuaja bacua jadiajiji cuana saisime putaidha? _____
4. ¿Ai ecuana ebuetsuatani bronce jenetia ajiji bacua quisa cuana ja? _____

Jabuetsuatique versículo Juan 3.14.



Mimiameque Diusu sa mimi puji Balaam ja saida bataidha
israelita cuana (Núm. 22 - 24) páginas 120-123.

Neicha israelita cuana mecuana sa yahua su janariatitaidha. Tueda yahua su dueji pia cristiano cuana anitaidha. Mecuana sa echua puji Balac banime puidha. Balac iyuame puidha israelita cuana, jucuada ba putsu. Daja huecha tueda yahua su Diusu jepuiti quisaquisa puji Balaam banime anidha. Balac ja beitutaidha mesa emebajaji Balaam paihuatita puji. Balac sa tsada puidha Balaam ja israelita cuana madhada su paichata puji. Daja biame Diusu sa tsada mahue puidha. Da su Balaam mue puti puidha emebajaji neje. Neicha hue echua puji Balac ja ihuametaidha Balaam echujetia equisa puji. Chamacama Balaam asunu bia je putidha Balac peje su. Da su Diusu duininidha Balaam neje. Edid'i su netiataidha mesa ángel Balaam hui su. Beju Balaam ja mue ba ataidha biame, mesa asunu ja bahui bataidha. Ba putsu, yaputi puidha. Cuaja jaitiana taji mahue jabati putsu, sanaidha. Beju sanaidha putsu, Balaam ja ichetaidha asunu. Da su asunu ja Balaam uja ataidha:

--¿Jucuaja su mi ema eicheinia? Jucuada mara yama mi mebjana biame, miada ema eicheinia.

Da hora su Balaam ja ángel espadaji eneti edid'i su bataidha. Uja ataidha ángel ja:

--Putique hue Balac peje su. Quisatique cuaja mi Diusu ja equisatani nime.

Da su Balaam echua puji Balac peje su cuinati putsu, Balac ja uja quisataidha:

--Echujetia mida yama saida, ahua miada israelita cuana madhada hue ya su.

Daja biame Diusu ja Balaam ataidha israelita cuana madhada su icha taji biame, paibunebata. Da putsu, echua puji Balac ðuinini putsu, Balaam tusa ete su beitutaidha.

1. Chamaque mapa Antiguo Testamento quirica su, página 317. Chacuque Moab banime yahua. ¿Ai banime puidha Moab yahua su aniji cuana sa echua puji? _____
2. ¿Jucuaja su iyuame puidha Balac? _____
3. ¿Jucuaja su echua puji Balaam neje ðuininidha? _____

Jabuetsuatique saida versículo Juan 3.14.



Mimmiamaque Balaam ja israelita deja cuana jucha ametaidha

(Núm. 22 - 24) páginas 123 -124.

Da su beju israelita deja cuana moabita epuna cuana neje madhada hue pupirutaidha. Moabita epuna cuana sa bid'umimi diusu eimea cuana peje su macha mitsutsuapirutaidha huecuana. Da su Diosu puidha pamapa jucha putaidha cuana pamanuta. Tueda ai cuana ape putsu, israelita cuana, moabita cuana neje jaichetitaidha. Israelita cuana ja pishitiametaidha huecuana.

1. ¿Ai mitsutsuataina moabita cristiano cuana ja? _____

2. ¿Cuaja putaidha juchaji israelita deja cuana? _____

Jabuetsuatique saida quita versículo Juan 3.14.



Mimiameque Moisés jamitsutaitiba israelita cuana neje

(Deuteronomio 4 - 6, 34) páginas 125 -126.

Beju israelita cuana Canaan yahua su enubi quitaita su, Diusu ja Moisés uja ataidha:

--Uja quisaque israelita cuana: "Micuaneda Canaan yahua su nubi putsu, mejusiacuinaque pamapa dapia aniji cuana. Berebere a taji tuna sa bid'umimi diusu eimea cuana. Ahua micuaneda daja ya su, yama micuana tueda yahua etiayu."

Daja hue Moisés ja uja quisaderataidha huecuana:

--Diusu bahui iyuba taji. Mebaja taji pamapa muesumu neje. Tueda bahui jei a taji. Daja hue meirutsuaderaque ai eirutsuaji cuana. Diusu ja micuana ibuneda ebatani. Buetsua taji micuana sa yanana cuana Diusu sa jacuatsasiati cuana tuneda di daja Diusu pamebajata puji. Be mesetaji Diusu.

Da su beju Moisés ja uja Josué ataidha:

--Diusu ja aimue ema enubiameta mahue tueda yahua su cristiano cuana neje tupupai. Ema eturuca miada ehuidusu huecuana Canaan yahua su.

1. ¿Ai ena mecuana sa petu taji puidha Canaan yahua su enubi puji? _____
2. ¿Ai diusu Canaan yahua su aniji cuana ja mitsutsuataidha? _____
3. ¿Jucuaja su mue nubi puidha Moisés Canaan yahua su? _____
4. ¿Aiya huidusutaidha israelita cuana Canaan yahua su? _____

Mimiameque Moisés ja bataidha yahua eichacua (Deut. 34)

página 127.

Da su Moisés Nebo banime emata su tsuatidha. Da jenetia huedhue bataidha Jordan ena. Daja huecha da jenetia Diusu ja Moisés yahua eichacua Canaan banime bametaidha. Diusu ja ataidha Moisés uja:

--Ye yahua jepuiti yama biahua tiempo jenetia tata chenu cuana quisataidha. Jiahue da quema israelita cristiano cuana yama enubiame. Mida mu aimue enubi mahue.

Moisés nime aimue anidha mahue pia deja israelita cuana duju su. Moisés bahui equita quitaita Diusu mitsu bahue puidha. Pia cuana mu tahui su bahui Diusu mitsu bahue puidha. Moisés ja ebia su ai nimetiuda cuana Diusu sa tucheda neje ataidha. Daja huecha Diusu saida mebaja bahue puidha. Tucheda, paciencia aidaji puidha cristiano cuana ehuidusu puji.

Da su Moisés manuji mahue su, Josué nubidha tu eturuca cristiano cuana ehuidusu puji, Diusu ja tueda dharetaidha putsu.

1. ¿Ai banime puidha Moisés tsuatidha emata? _____
2. ¿Aidhe ehuidusuji puidha Moisés eturuca? _____
3. ¿Cuaja Moisés ja Diosu mitsutsuataidha? ¿Equita quitaita ahua tahui su? _____
4. ¿Ai deja puidha Moisés? _____

Jabuetsuatique versículo Juan 13.34.



Mimiameque DIUSU SA JACUATSASIATI CUANA (Levítico)

páginas 128 -130.

Ye quirica su ecuana ebuetsuatiani Diusu ja tiataidha jacuatsasiati cuana jepuiti. Tueda jacuatsasiati cuana Diusu ja Moisés tiataidha Sinai banime emata su. Ye quirica ja Diusu butsepi, iyuda ebametani. Diusu ja ye quirica neje mesa cristiano cuana cuaja saida nimeme pu taji buetsuataidha. Ye quirica neje Diusu ja israelita cuana buetsuataidha cuaja eirutsuaji ai cuana ame ya puji. Daja huecha tsine cuana jepuiti buetsuataidha huecuana. Doce familia cuana duju jenetia Diusu ja Levi chenu sa familia cuana dharetaidha sacerdote paputa huecuana puji. Aarón sa equene sacerdote pu taji puidha, Levi chenu sa familia jenetia putsu. Ye quirica ja Aarón, mesa ebacua cuana neje buetsuataidha cuaja sacerdote sa mudu cuana ya puji. Tuneseda animalo jenetia eirutsuaji cuana a taji puidha. Daja huecha ejaja cuana, incienso, pan jenetia di. Irutsuaji cristiano cuana ai eirutsuaji cuana sacerdote cuana peje su menajatiataina Diusu peje su pairutsuata huecuana puji.

1. ¿Ai animalo cuana irutsuataidha israelita cuana ja?

2. ¿Ai animalo cuana be padiata ataidha huecuana Diusu ja?

3. ¿Aidhe sa familia dharetaidha Diusu ja sacerdote puji?

4. ¿Quebata 7 tsine cuana israelita cuana sa a taji puidha?

Jabuetsuatique saida versículo Juan 13.34.





Moisés jamitsutibana israelita
cristiano cuana neje.



Josué nubidha Moisés eturuca
cristiano cuana ehuidusu puji.

AGRADECEMOS

a

David C. Cook Foundation
Elgin, Illinois, E.U.A.

quien nos ha provisto con
los dibujos

y a

La Liga Bíblica del Hogar de Canadá
por su contribución
para la publicación de este libro.